

**Kasano a Maiyanak
nga Mabaliwan
ti Maysa a Pinarsua?**



ni Chuck Smith

P.O. Box 8000 • Costa Mesa, CA 92628 • 1-800- 272- WORD (9673)

E-mail: info@twft.com • Website: www.twft.com

Kasano a Maiyanak nga Mabaliwan ti Maysa a Pinarsua?

ni Chuck Smith

@2002 The Word for Today Publishers

P.O Box 8000

Costa Mesa, CA 92628

Web Site: www.twft.com

Dagiti nailaad a skriptura ket naggapu iti katarusan ti Ari Santiago ti Biblia. Ti nadumaduma a palawag ket kabukbukudan a kapanunutan ti mannurat.

Amin nga kalintegan ket nailatangan. Awan parte daytoy a pannurat ti mabalin a mausar, matulad, maibunong, maidulin tapno mausar to manen, wenna maipatulod iti asinno man nga awan ti pammalubos ti *The Word for Today*.

Naipablaak iti Estados Unidos ti Amerika.

Kasano a Maiyanak nga Mabaliwan ti Maysa a Pinarsua? ni Chuck Smith

Manipud iti nasipnget nga pag lemmengan na, immasideg ti lalaki ken ni Hesus Nazareno. Maysa isuna a pangpangulo dagiti Hudyo. Inuray na ti rabii tapno makasarita na nga nalimed ni Hesus. Ni Nicodemus ti agpalpaliw iti likudan ni Hesus, buybuyan-na ti nadumaduma a mirakulo ti Apo. Ammo ni Nicodemus nga awan sabali a makaaramid kadagitoy nga pagsidsiddaawan no ti katatao na ket saan a maka-Dios. Pagam-ammuan agmaymaysa ni Hesus ket innala ni Nicodemus a gundaway daytoy.

“Maestro,” kinuna na. “Ammomi nga maka-Dios dagiti bambanag nga isursurom, ta awan makaaramid kadagitoy no saan nga adda iti sidong na ti Apo.”

Ammo ni Hesus ti kayat nga saw-en ni Nicodemus, ket awan ti pinukawna a tiempo. Kinunana, “Ingganat di maiyanak nga mabaliwan ti maysa a tao, saanna a makita ti pagarian ni Apo Dios.”

Apagdengeg ni Nicodemus kadagitoy nga sao, kinunana, “Ania ti kayat nga saw-en ti ‘maiyanak a mabaliwan’?”

Daytoy ti palpalutputen ti sangalubongan manipud pinnulo nga tawen. Mabasa ti balikas ni Hesus iti Juan 3:3, “Simmungbat ni Hesus, ket kinunana kenkuana: Pudno, pudno, kunak kenka, no ti maysa a tao saan nga maiyanak nga mabaliwan, saan nan to a makita ti pagarian ti Dios.”

Pinarsua ni Apo Dios ti tao kas maysa a trinidad: espiritu, panunot, ken bagi. Saklaw ti espiritu ti panunot, ket aginggana nga situturay daytoy, agnanayon ti pannaki-komunyon ken ni Apo Dios. Ti biag ti mula, kas pagarigan, ket maysa laeng nga kaawatan. Bibiagen laeng ti sustansiya ti daga ken kalangitan. Maysa pay nga ehemplo ti 'venusflytrap', mulmula dagitoy ket insekto ti pagbiagan da. No la ketdi siraramut ti mula, makapagpaadu a bukodna ta naaddaan iti bukel nga

nangibalay iti pagbunobon. Sabali met ti ayup nga agkadua a kaawatan: bagi ken kaammuan, wenna makuna nga isip. Pagbiagan na ti mulmula ken nadumaduma nga ayup, ket makaadayo da nga agsawar. Kas iti mula, kabaelan met ti ayup ti agpaadu a bukod gapu iti sangabagian a kodigo. Kas banag ti lawa ti kaammuan ken bael da nga agsawar, nangatangato ti saad da ngem iti pagarian ti mula.

Pinarsua ni Apo Dios ti tao nga agkatlo a kaammuan: espiritu, bagi, ken panunot. Ti nainayon nga ‘espiritu’ ti mangipan iti tao iti kangangatuan a saad, adayo a ngatuen na ti ayup wenna mulmula. Iti daytoy nga saad ti pakasarakan na ken ni Apo Dios.

Sinao ni Hesus nga Espiritu ni Apo Dios, ket asinno man ti agdayaw kenkuana ket agdayaw iti Espiritu ken Kinapudno (Juan 4:24). Pinarsua ni Apo ti tao nga espiritu, panunot ken bagi tapno mabalina na ti makigimong iti sidong na.

Naadaan tayo iti napintas nga versikulo iti Genesis 3:8, “Ket nangeda ti timek ni Jehova Dios a magmagna iti minuyongan iti lamiis ti aldaw...” Inaldaw nga siwaywaya nga makigimong ken makikomunyon ti tao iti sidong ni Apo Dios ta na-Espirituan ngarud ti katatao na. Ngem no maiddep ti biag ti espiritu na, maitulad isuna kadagiti ayup. Ngamin ta ti turong ti panunot ket maymaysa, ti laeng pagduyosan ti pisika nga bagi ti masursurot.

Napukaw ti silaw ti espiritu ti tao gapu iti madi nga aramid ken adu a basbasol.

Idi rugrugi, idi pinarsua ni Apo Dios ti tao, nagbiag isuna iti nadalus ken napusaksak a paglawlawan. Indakkel na ti pigsang ken salun-at ti bagi, awan ti kurang wenna pakadillawan. Gapu ta nabiang ti espiritu na, naited kenkuana ti sinanayon a panakigimong ken pannakikomunyon ken ni Apo Dios. Ngem simrek ti salimuot.

Nagbiag kadi ti tao nga makigimong ken ni Apo Dios ta ayayatenna na ngamin isuna?

Wenna nagbiag isuna nga makigimong ken ni Apo ta awan ti sabali nga pagpilian na?

Tapno maammuan ti kinapudno ti puso ti tao, nangipan ni Apo Dios iti nakapinpintas nga puon ti kayo iti Hardin ti Eden: kayo nga naadaan iti maiparit

nga bunga, bunga nga mangted iti pakatayan ti espiritu. Nagtungpalanna kinasapulan ti tao ti agpili: kayatna kadi nga agtultuloy ti pannakigimong na ken ni Apo Dios, wenna suruten na dagiti pagduyosan ti bagi, uray no isu ti pakapukawan ti pannakigimong na ken ni Apo Dios?

Iti kinamangmang na, pinili ni Adam nga suruten ti pagduyosan ti bagi ken rikna ket kinnan na ti maiparit nga bunga. Napukawna ti biag ti espiritu na ket insegida a nagkadua ti kaawatan ti tao: bagi (pisikal) ken karkarma (isip).

Imbaga ni Hesus ken ni Nicodemus nga masapul na ti maiyanak nga mabaliwan (Juan 3:7).

Kasapulan tayo ti na-Espirituan nga panagbaliw. Timmaod tayo nga pisika ket napukaw tayo ti pannakikadua ken ni Jehova Dios. No pudno a kalikaguman ti naragsak nga panagbiag nga ited ti kaadda ti Apo iti sidong tayo, masapul ti na-Espirituan a panagbiag. Iti pannakapukaw na iti na-Espirituan a biag, naawatan ni Adam nga saan a ti kinasayaat wenna kinarelihiyoso, wenna ti panangsaruno iti nadumaduma nga pannurotan ti mangpasubli iti pannakigimong iti sidong ni Apo Dios.

Saan nga makaumanay ti kinasayaat ti nakem laeng.

Intuloy ni Hesus ti sarita na ken ni Nicodemus, “No ti maysa a tao saan nga maiyanak nga mabaliwan, saan na nga makita ti pagarian ti Dios.” (Juan 3:3)

Saan nga magaw-at ti gagangay a tao ti kayat nga saw-en daytoy a kaawatan. Narigat na nga masinunuo. Daytoy ti insurat ni Paolo kadagiti Corintiyano, “Siasinno ngarud kadagiti tao ti makaammo kadagiti banbanag ti maysa a tao, no saan a ti espiritu ti tao nga adda kenkuana? Kasta met nga awan ti makaammo kadagiti banbanag a maka-Dios no di ti Espiritu ti Dios. Inawat tayo, saan a ti espiritu ti lubong no di ti Espiritu a maka-Dios, tapno maammuan tayo dagiti naparaburan a banbanag a siwayayya nga inted ti Dios kadaytoy. Ket dagitoy a banag saw-en mi met, saan a kadagiti sao nga isuro ti sirib ti tao no di dagiti isuro ti Espiritu Santo, nga mangiyasping kadagiti banbanag a naespirituan. Ngem ti tao a pisika saanna nga awaten ti banag ti Espiritu ti Dios; ta kenkuana lalaaw laeng dagitoy; dina met ida mabalin nga maawatan, ta dagitoy ket nai-Espirituan ti

panakabigbigda." (1 Taag Corinto 2:11-14)

Kas sinoa ni Paulo, saan a maawatan ti bagamundo a tao dagiti bambanag nga nai-Espirituan. Kasla paglalaawan daytoy. Isu't gapuna a narigat nga agkinnaawatan ti nai-Espirituan ken nailubongan a tao.

Dimo kadi madlaw a narigat ti agpalawag iti maysa nga ubing? Maysa nga paggapuan ti salimuot daytoy ket kunam, "Sapay nga saanna a maawatan? Nakalawlawag ket. Nakalaklaka. Apay nga dina makita?"

Iti na-Espirituan nga banbanag, agnagnakem a kas maysa nga ubing ti bagamundo a tao.

Isuro ti Biblia a narigat nga maawatan ti gagangay a tao ti na-Espirituan a banbanag ta masapul nga umuna a maaddaan isuna iti na-Espirituan nga sirmata. Daytory ti sinawang ni Hesus, "masapul nga maiyanak nga mabaliwan ti tao tapno makita na ti pagarian ti Apo." Na-Espirituan a pannaka-iyanak ti kasapulan tayo.

"Kasanoak nga maiyanak nga mabaliwa?" kuna ni Nicodemus. "Ania ti kasapulan tapno maiyanakak manen? Kasano ti pannakabalin daytoy?"

Tapno alisto a maawatan ni Nicodemus ti palawag na, nangaramat ni Hesus iti ladawan a naggapu iti Daan a Tulag, libro ti Numeros. Idi adda iti kagubatan dagiti annak ti Israel, nangrugida nga agasug maipanggep ken ni Apo Dios ken Moses. Kunada, "Inruar na tayo manipud idia y Egipto tapno patayen datayo idtoy kagubatan. Awan ti kanen tayo ket makaparusoken daytoy manna" (Numeros 21:5).

Gapu ta agmuryot ken kaunget da ni Apo Dios, pinalubosan ti Apo a makastrek iti kampo dagiti makapatay nga ul-uleg. Saan a nagbayag ket adun ti natay a tao nga kinagat ti uleg. Nagsaklin dagiti annak ti Israel ken ni Moses sada dimmawat iti pakawan, ken kinniddaw da nga ilualoan na ida. Dimngeg ni Moses ket dinawat na iti Apo nga paimbagenna koma ida.

Nupay no kasta, imbes nga agasan ti Apo ida, kineddengnan na ida nga isuda nga mismo ti mangsinunuo iti yiimbag da.

Iti Numeros 21:8 mabasa tayo, "Ket ni Jehova sinoa na ken Moses,

‘Mangaramid ka iti maysa nga umapapuy nga uleg nga naipan iti kayo, ket ibayog mo iti maysa a monmon; ket maaramidto nga asinno man ti makagat ket kumita kenkuana, agbiag to daytoy.’”

Nangaramid ni Moses iti uleg-a-suer a naipan iti kayo a naidayog iti monmon iti tengnga ti kampo. Ket manipud idin, no adda kagaten ti uleg, maisuro daytoy a kumita iti uleg-a-suer ket maagasan a nalaka.

Kayat ko nga ilawlawag ti kayat nga sawwen daytoy nga kayarigan. Iti skriptura, ti suer ti pakaiyarigan ti hustisya ni Apo Diyos. Naaddaan dagiti annak ti Israel iti suer nga altar a pagdatonan (2 Ar-Ari 16:15). Kasta met nga iti skriptura, ti suer ti pakayarigan ti basol (lagipen ti uleg iti Hardin ti Eden – Genesis 3:13). Iti daytoy a banag, ti pannakaingato ti uleg nga adda iti kayo a naibayog iti monmom ket maiyarngi iti kuros nga nakaipakuan ni Hesus. Kinuna ni Hesus, “Kas iti daytoy maingatunto met ti Anak ti Tao” (Juan 3:14). Ken manen iti Juan 12:32 kinunana, “Siak, no maingatoak to iti kangangatuan, umay to amin Kaniak ti sangalubongan.”

Impadto ni Hesus ti ipapatay nanto iti kuros.

Ngarud, ti asuer-a-uleg nga adda iti kayo nga naibayog iti monmon ti pakaiyarigan ti basbasol tayo nga sinubbot ni Apo Dios iti kuros.

Kas iti panangingato ni Moses iti suer-a-uleg iti kagubatan, kastanto met nga maingato ti Anak ti Tao. Kasano a maiyanak nga mabaliwan ti maysa a tao? Magun-od daytoy iti inted ni Apo a gundaway, ti pannakatay ti Anak na a Hesus iti kuros. Inako ni Hesus ti husga dagiti basbasol tayo idi isuna ti naipako iti lugar tayo. No maawatan tayo daytoy, ket kumita tayo a sipapati ken ni Hesus, masinunuo tayo nga imbaklayna ti husga ni Apo Dios a dapat koma nga naited kadatayo.

Iladawan iti isip a nagbiag ka iti tawen 3,800 - tiempo dagiti annak ti Israel, idi immay dagidi ul-uleg iti kampo. Maysa nga aldaw, kasarsaritam ti gayyem mo ket pagammuan rimmuar ti maysa nga uleg ket kinagat na ti saka ti gayyemmo. Sikikita ka ngem awan met ti maaramidmo, ket di mabayag nagbigkog ti sakana, sa nag kombulsiyon.

Insegida a ginuyod mo ti gayyem mo iti ruar ti tolda samo impukkaw

kenkuana, “Mingmingam ti uleg iti kayo, tay inngato ni Moses iti tengnga ti kampo!”

“Kasanonak a mapaimbag ta paar-aramid mo?,” kunana.

“Sannak a kasinnungbat,” impukkawmo. “Kitaem kunak!”

“Diak maawatan. Kasano-ak nga umimbag iti panangkitak iti uleg? Matayak to met laengen.”

“Diak ammo nga ipalawag,” kinunam. “Ammok laeng nga adun nga tattao ti natay koman. Ngem apag-kita da idiyay uleg nga adda iti kayo nga naindayog iti monmon ket immimbagda. Kitaem kunak la ngarud!”

“Linoloko,” kuna ti gayyemo. “Diak kayat nga kitaen.”

Ket natay ti gayyemmo. Ket narigat mo a pasien nga awanen daytoy ta dimo met dinawat ti narigat nga aramid no di ket laeng ti ikikitana. Saanna nga nasapul nga awaten ti kas gapuna tapno matulungan isuna.

Natay met ni Hesu Cristo maipanggep iti basbasol tayo, ngem ditay masapul nga maawaan no kasano ti pannaka-aramid ti panagbaliw tayo iti naibagian nga Espiritu. Umanayen ti pammati tayo ken ti kinapudno nga mabalin daytoy. Pagarigan dagiti annak ti Israel iti disyerto, saan tayo met kasapulan a maawatan dagiti nadumaduma nga addang da tapno maragsakan tayo iti banag na. Kabalinaan tayo ti agbiag nga sikokomunyon ken sigigimong ken ni Apo Dios, ken tagikuaen ti naigloriaan a biag-nga-agnanayon, biag nga awanan basol.

Impalawag ni Hesus no kasano ti maiyanak nga mabaliwan manen idi kinunana, “Idi inngato ni Moses ti uleg iti kabakiran, kasta met nga maingatton to ti Anak ti Tao ket no asinno man ti mamati kenkuana saan to nga matay, ngem maaddaanto iti biag nga agnanayon” (Juan 3:14-15).

No awan kadatayo ti na-Espirituan a pannakaiyanak, nakurang ti katatao tayo. Masinunuo ti gagangay a tao nga adda pagkurangan ti biag na ket ikalikagum na ti pannakapunno daytoy. Kas gagangay ti tao, ti ammona nga pangpunno iti kawaw ti biag na ket dagiti nadumaduma nga bagamundo nga aramid. Kinapudnona, awan pagpatinggaan ti pannaka-uwaw uray aglablabon ti aramid nga bagamundo, wenna ti panagpaadu iti sanikua, addanto latta diay kawaw nga rikna. Ta ngamin

awan ti makapunno kadaytoy nga kawaw no saan nga nabiag ti Espiritu. Masapul ngarud ti pannaka-iyanak nga mabaliwan, ket magunod daytoy iti biag nga na-Espirituan.

Naparsua ti tao nga sumuknal ken ni Apo. No saan mo nga ikalikagum ti sumuknal iti pudno ken sibibiag nga Dios, sigurado nga agsapul ka iti kasukat na, dagitay nadumaduma a didiose. Diay kotsem, ti balay mo, ti bangkam. Atiddog ti listaan no mainagan amin. Ti panangsuknal ken ni Apo ket naibagi kadaytoy.

Mabalin nga kunam nga mangmang daytoy nga palawag. Mabalin nga dimo maawatan no kasano ti panakaiyanak nga mabaliwan iti Espiritu babaen iti pammati ken ni Hesu Cristo. Mangmang man daytoy, inaramid ni Apo Dios tapno uray ubing ket maikkan iti gundaway nga maiyanak nga mabaliwan iti Espiritu.

Intuloy ni Hesus nga impalawag ken ni Nicodemus nga “Ta kasta la unay ti panangayat ti Dios iti lubong; ta intedna ti Anakna a Bugbugtong, tapno amin a mamati kenkuana, saan a mapukaw, no di ket maaddaan iti biag nga agnanayon.” (Juan 3:16)

Malagipko manen dagiti annak ti Israel idi addada iti disyerto, ket babbabalawen da ni Apo Dios kadagiti rigat da, agtananabutob ken agmurmuryot da, no ti kinapudnona ket isuda ti akinbasol iti kasasaad da. Kas gagangay ngarud daytoy ti tao. Tallikudan tayo ni Apo Dios; ket suruten tayo ti adu nga sulisog. Gapu kadagitoy ng aramid, umay kadaytoy ti kawaw, tungday ken lemdaang. Ti biag ti pisika a bagi ket makapatay. Maiparis daytoy iti kagat ti uleg nga agpirdi ken pumatay pay.

Ngem ti atiddog ken karigat a tiempo iti kabakiran para kadagiti annak ti Israel ket saan nga inkeddeng ni Apo Dios. Kayat na ida nga idateng iti naikari a lugar, no antoy ti pakagun-udan da iti naragsak a biag ken paka-adddaan da iti napnuan bunga a daga; kas inkari ti Apo kadagiti pupuonda, ti ama da nga Abraham. Ngem dida inawat ti palawag da Caleb ken Joshua. Kunada, “saan tayo nga makastrek idta nga lugar. Napigpigsaga dagiti kalaban tayo.” Tinalikudanda ti iseserrek da ket nagsublida iti kabakiran. Idi marikna dan ti nagmaayan ti aramid, binabalaw da pay ni Apo Dios.

No adda ka iti bukod mo a kabakiran kadagitoy nga aldaw, saan na kayat nga saw-en nga impalubos ni Apo Diyos daytoy. Saan nga kayat ti Apo nga bagamundo ti kalidad ti biag mo. Ti kayat na para kenka ket biag nga napnuan iti Espiritu, tapno magun-od mo amin dagiti parabor nga agur-uray kenka, ken manamnam mo dagiti bungbunga ti pannakikadua ken pannakikomunyon Kenkuana.

Saan nga naawatan dagiti annak ti Israel ti gandat ni Apo Dios ken no apay impalubos na dagiti uleg nga makastrek iti kampo. Ngamin, masansan nga ipalubos ni Apo Dios nga magna tayo iti rigat no mangrugi tayo nga agturong iti nadaksan nga dalan. Ammona nga dagiti nasakit nga padas ket manglawlawag iti panunot tayo, tapno kasta ket agsubli tayo Kenkuana. Saan nga pangeddeng nga aggapu ken ni Apo Dios daytoy. Kunana, “Umayka Kaniak. Saan mo a gun-uden ti panagbiag nga adayo Kaniak ta mapirdika. Adtoy ti ehemplo ti mapasamak kenka no padasem ti agbiag nga awanak iti sidongmo.”

Naipanakem daytoy nga mangisubli kenka ken ni Apo, tapno maiyanak ka nga mabaliwan iti Espiritu tapno maaddaan ka iti manayon nga pannakikadua ken ni Apo Dios.

No saan a situtulong ni Apo Dios kadakuada, natay koma dagiti annak ti Israel iti kabakiran. Saan da koma nga nagbayag iti dua nga lawas, wenna uppatapulo nga tawen. No kas pagarigan agdama ka inti bukodmo a kabakiran, ammuem nga adda ti Apo kenka nga situtulong. Taptapayaen naka. No saan na ka a sarsaranayen, saan mo nga kabaelan ti agbiag iti uray lima laeng nga sekundo.

Utang mo kenkuana ti biag mo. Sarsarapaen na ka tapno masinunuom ti ayat ken panakaseknan na kenka, tapno maiyanak ka a mabaliwan iti Espiritu, tapno no kasta ket magtengmon to ti napnuan ragsak a lugar nga inlaem ni Apo Dios para kadatayo amin.

Adu kadakayo ti magmagna iti nadidigraan nga dalan nga pakatayan. Masapul nga agsubli kayo ken ni Apo Dios. Saan mo nga urayen nga dumteng ti pakaperdiam. Ti nai-gloriaan a kari ti Apo ket no mamati ka iti Bugbugtong nga Anak na, saan ka nga matay no di ket agbiak nga agnanayon. Ti agnanayon nga

biag ket maipanggep iti kababalin ti biag, saan nga it panag-paadu it gameng. Ngamin, ti biag nga naaduan nga awan iti kalidad na ket impiyerno. Ti na-Espirituan nga biag ket naddaan iti kalidad nga nangatngato nga adayo iti ayup. Di pay ket mabalin nga iparis.

Daytoy ti biag nga pangaw-awagan ni Apo Dios kenka, biag nga na-Espirituan, biag nga sikakadua Kenkuana, biag nga agnanayon. Sinao ti Bibliya nga ti panunot nga maipanggep laeng iti pisikal ket agturong iti patay, ngem ti biag nga na-Espirituan ket biag a napnuan iti kapia ken ragsak; ragsak nga aggapo iti pannakikadua iti Apo, ti panakaammo nga adda Isuna kenka, kakuykuyogmo, ken ti kapia ti panunot nga Isuna ti mangiturturong iti amin.

Ti maysa nga tao ket makuna nga ‘naiyanak manen nga mabaliwan’ no mamati isuna iti inted ti Apo nga wayya ti pannakapakawan ti basbasolna, basbasol nga imbaklay ni Apo Hesus. Ta ngamin, no awatem ni Apo Hesus a kas Saklolom ken patiem nga natay Isuna para kadagiti basbasolmo, maaddaan ka iti nakakaskasdaaw ken napalimed a panagbalbaliw kas resulta ti na-Espirituan nga pannakaiyanak mo. Pagamammuan maaddaan ka iti nabuklan a biag ken nabaruan a Espiritu a dimmo inggarup nga mabalin. Natan-ok ken nakakas-kasdaaw daytoy nga pasamak, ket saan a mabalin nga iyarngi iti ania man a banag iti napalabas, ta ngamin narigat daytoy nga ipalawag. Sinao ni Paulo nga dagiti nai-Espirituan nga banbanag nga napadasna ket nakakaskasdaaw ket maysa nga panaglabsing ti mangpadas nga ipalawag daytoy (2 Taga Corinto 12:4).

Sinao ni Apo Hesus nga “no kayat mo nga makita ti pagarian nga kangatuan, ket kayat mo nga maawatan daytoy, masapul nga maiyanak ka a mabaliwan nga na-Espirituan.”

Masapul ti pannaka-iyanak nga na-Espirituan tapno makastrek ka iti pagarian ni Apo Dios. No sikikita ka ken ni Apo Hesu Cristo, nga natay iti kuros para kadagiti basbasolmo, ket mamati ka Kenkuana ken iti naindaklan nga ayat na kenka, maaddaan ka iti na-Espirituan nga panagbaliw. Isu nga ti damagek kenka ket, “Naaddaan ka kadin iti na-Espirituan nga pannakaiyanak? No saan, simple

laeng ti masapul nga maaramid.

Itatta addaka inti maysa kadagiti dua a kampo; nakasalaan daytoy iti relasyon mo ken ni Apo Hesu Cristo. Mabalín nga mamati ka ken ni Apo Hesus a natay iti kuros para dagiti basbasolmo; wenna adda ka iti kampo nga ti kalikaguman-na ket agtultuloy ti agdama a biag nga awan ni Apo Hesus. No itultuloy mo laeng ti agdama a biagmo nga awan Ni Apo Hesus, sigurado ka ngarud nga agturong iti paka-perdiam.

Ngem no iturong mo ti panagkitam iti kuros ket patiem Isuna nga natay para kadagiti basbasolmo, maited kenka ti siwawaya-wayya nga sagut ni Apo Dios

Ti sagut ti biag nga agnanayon.

Lualo ti Managbasol

No gungunudem ti nainget nga pannakikabagyan ken ni Apo Dios ken ti talged ti nakem nga napakawanen ti basbasolmo, daytoy ti lualuem.....

Dios nga Ama, umayak kenka ta idaton ko amin dagiti basbasolko, ket dawatek nga pakawanennak koma. Agyamanak Apo, ta ingkarim nga no ipaduyakyak ko amin dagiti basbasolko, sisasagana ka nga mangpakawan kaniak ken dalusannak manipud iti amin nga kinadakes. Sipupudnoak nga tumallikud kadagiti basbasolko, ket agbiagak koma nga mangdaydayaw Kenka. Tulungannak koma, Apo. Ikannak iti pigsang nga igawad ti Espiritum tapno maiturong iti nasayaat ti biagko.

Agyamank kenka iti panangako ni Apo Hesu Cristo kadagiti basbasolko nga nangigapu iti pannakatay na iti kuros, sa nagbiag maanen. Awatek Isuna a kas Saklolo, a kas Apok, ken kas Gayyem.

Agyamanak Kenka, ta sinaom nga asinno man ti umay Kenka saan mo nga tallikudan. Agyamanak iti panangtedmo kaniak iti nabaruan nga biag ken ni Apo Hesu Cristo. Itedko Kenka ti aminko. Aramidem kaniak ti pagayayatam, iti nagan ni Hesus. Amen.

Ania ti Sumaruno?

No inawat mo ni Apo Hesu Cristo a kas Saklolom, maysa ka kadagiti naiyanak nga nabaliwan. Adtoy ti dadduma a banag nga makatulung iti idadakkel mo a na-Espirituan a Kristiano.

1. **LUALO** – ti lualo ket kasla telepono nga makagteng nga direkto ken ni Apo Dios. Kasapulan nga maaddaan ka iti tiempo nga makisarsarita Kenkuana iti inaldaw, no ad-adu, nasaysayaat pay. Taga Filipos 4:6
2. **BASAEN TI BIBLIYA** – ti Bibliya ket kasla surat ti puso nga naggapu ken ni Apo Dios. No basbasaen nga kanayon, ad-adda ti panangayat mo met ken ni Apo Dios. 1 Pedro 2:2
3. **PANNAKIGIMONG** – masapul nga ti gagayemmo ket naaddaan iti pammati a kas kenka tapno makasaranay ken makapag-patalged iti nakemmo. Isu nga ikalikaguman ti pannakasapul iti simbaan nga mamati ken mangisursuro iti puro nga Sao ti Apo nga naibalay iti Bibliya; idtoy met ti pakaam-ammuan iti dadduma nga naiget a Kristiyano. Hebreo 10:24-25
4. **IPADUYAKYAK ITI SABALI** – Ibalikas mo ti pammatim ken ni Hesu Cristo iti sabsabali nga tao. Dawatem ken ni Apo Dios nga ipakita na kenka no kasano ti panangbalikas mo, ken no kaano. Evangelio ni Marcos 16:15

Ni Chuck Smith ket kangatuan a pastor iti Calvary Chapel Costa Mesa, California. Nasurok nga limapulo a tawenenen nga mangisursuro itit Bibliya. Mangeg dagiti inaldaw nga adal ti Bibliya manipud iti nadumaduma a radyo estasyon iti naisangalubongan nga programa, The Word for Today. Dagiti dadduma a libro nga sinurat na ket Sibibiag a Danum (Living Water), No Apay Sukatan ti Grasya ti Amin (Why Grace Changes Everything), ken Pataud ti Biag a Napnuan Lualo (Effective Prayer Life)

The Word For Today

P.O. Box 8000, Costa Mesa, CA 92628

(800) 272-WORD (9673)

www.TWFT.com

www.calvarychapel.com

Bendisyonan na ka ti Apo, ket sapay koma ta agtultuloy nga umiget ti relasyon mo ken Ni Apo Hesu Cristo iti inaldaw-aldaw!

NAIYANAK NGA NABALIWAN

Balikas nga nangeg tayon.

Ngem maawatan tayo ngata ti kayat na nga saw-en?

Ken sapay nga kinuna ni Jesus nga kasapulan
tayo ti maiyanak nga mabaliwan tapno makita tayo
ti pagarian ni Apo Dios?

Ipaawat kadaytoy daytoy nga babasaen ti paggidiatan
ti pisikal ken nai-Espirituan nga pannakaiyanak.

Ken no apay nga pinarsua ni Apo Dios ti tao.

Ta ngamin ti kinapudnona ket saan daytoy nga
maipanggep iti relihiyon. Daytoy ket maipanggep
iti naiget nga relasyon iti Apo.